

Corosu norĩ
Corosu norĩ ma, Paru te te
ĩrob'ui'érézé
Ĩbaihâ wasu'uzé

Paru hã darob amoi ãma dazazéb 're hãimana sirômo, ma tô rowasu'u hã wapa, Zezusihi zazei'wa norĩ ma, roti senai'õ na da te tãma 're ĩrowasu'u za'ra mono zém na hã, Corosu ãma 're ĩsi'ubumroi mono norĩ ma hã. Taha wa, Paru hã ma tô Corosu norĩ ma rob'ui'éré za'ra, roti senai'õ wi, te te uwati za'ra da. Ma tô duré tãma roti za'ra, Zezusi hã apã te te saze za'ra da, Epapراسي hã ĩmorĩrata na te te tãma ĩwaihu'u za'ra zéb zarina. Epapراسي hã Corosu ãma ĩsazei'wa norĩ 'madâ'â'wa, ta hã. Paru hã ma tô duré tãma waihu'u za'ra, ãne: Zezusihi si siminho'reptu waihu'u pese di. Duré taha si dawasédé hã te te dama 're apari waihu'u pese mono di.

1-2 Wa hã Paru, Cristu Zezusihi zadawa wasu'u'wa, wa 're ĩhãimana, 'Re ĩhãimana u'âsi mono te te sima ĩwēzéb zarina. Taha wa, wa ãma aima rob'ui'éré za'ra wa'wa, Corosu na 'ri nho'õmo nhisi ãma 'Re ĩhãimana u'âsi mono nhib'a'uwē 're aihãimana za'ra wa'aba mono norĩ ma. Wasisānawā Timotiu te duré ãma asawī za'ra wa'wa. A norĩ wa'wa hã te oto wasiré wasisānawāi wa, 're anomro wē wa'aba mo Cristuhu ãma si, tiwi 're aipizari za'ra wa'aba mono ãna.

Wamama ma, wa ai'ãma 're ĩmreme u'âsi za'ra wa'wa, 'Re ĩhãimana u'âsi mono ma, ĩsimizawizé hã

ai'ãma 're hâimana u'âsi za'ra wa'aba mono da, rowẽ u'âsi, ãma 're anomro aba mono da.

Paru hã 'Re ãhâimana u'âsi mono ãma ãwatazé wasu'u

³ 'Re ãhâimana u'âsi mono ma, ai'ãma 're wamreme zusi aba mono sidâpâsi, wa ãma 're wawata u'âsi za'ra, Wanhîb'apito Zezu Cristuhu mama ãma hã.

⁴ Cristu Zezusihi si asina 're ã'umnhasi za'ra wa'aba mono zé wasu'u hã, duré uburé 'Re ãhâimana u'âsi mono nhîb'a'uwẽ 're ãsawi pese za'ra wa'aba mono zé wasu'u hã wa te 're wapari za'ra mono wa, wa ãma 're wawata u'âsi za'ra, 'Re ãhâimana u'âsi mono ãma, ãne na oto 're aihâimana wẽ za'ra wa'aba mono wa.

⁵ Cristuhu wasu'uwẽ hã tô sena uptabi hã ãmorĩ'rata na da te atẽme ãwisi za'ra wa'aba wamhã, tame ma tô ãwapari na'rata za'ra wa'wa, ãwẽ uptabi hã hãîwa ãma dazô 're ãsimi'wara mono zé wasu'u hã, duré taha zô si 're ãdanhîmîpari u'âsi za'ra mono zé wasu'u zama. Taha zô asina 're asimîpari za'ra wa'aba mono zéb zarina, ma tô Cristuhu si asina 're ã'umnhasi pese za'ra wa'aba mo. Taha zarina ma tô duré 'Re ãhâimana u'âsi mono nhîb'a'uwẽ norĩ hã 're ãsawi pese za'ra wa'aba mo. Hãîwa ãma, wẽ uptabi na asô 're ãsimi'wara aba mono hã, te tô 'Re ãhâimana u'âsi mono hã te te asô 're 'madâ'â pese za'ra wa'wa. Taha zô si te tô asina 're asimîpari u'âsi za'ra wa'aba mo.

⁶ Cristuhu wasu'uwẽ hã ma tô da te ãma ropé oto, ropâ. Taha wa, ma tô ãsazei'wa norĩ hã dasina tahâ'â ni oto. Taha wa, ma tô dahâîmanazém na da te 're saprĩ za'ra, ãwẽ u hã. Tane ma tô duré ãwasu'uwẽ hã aima 're hâimana za'ra wa'wa, ãwapari

na'rata za'ra wa'aba zém hawimhã. Tame ma tô oto ïwaihu'u za'ra wa'wa, tô sena na 'Re ïhâimana u'âsi mono te te 're ïda'azawi pese mono zém na hã.

⁷ Epaprasihî nhimirowasu'u zarina, ma tô ãma ïwaihu'u za'ra wa'wa. Ta hã Cristuhu ma wasiré romhuri'wa, wama ïsawi pe hã. Simi'ê na te Cristuhu ma, te te ai'ãma 're romhuri pese za'ra wa'wa, wa'upana.

⁸ Ta hã ma tô wama aiwasu'u wê za'ra wa'wa, 'Re ïhâimana u'âsi mono pē'ēzani te te 're aipawaptob za'ra wa'aba mono zéb zarina, asimizawi pese zé hã oto ïwaihu'u za'ra wa'aba zém na hã.

⁹ Taha wa, aiwasu'u wê hã wa te ïwapari na'rata za'ra wa'aba zém hawim haré, wa tô õne u'âsi ai'ãma 're wamreme zusi u'âsi 'wa, 'Re ïhâimana u'âsi mono ma. Ta hã te te sima 're aiwê za'ra wa'aba mono zéb uwaibaba, niha oto ãma 're aihâimana za'ra wa'aba mono da, duré te te aima 're waihu'u za'ra wa'aba mono da, wa tô wa te tiwi aima 're rowaptērē u'âsi za'ra wa'wa. Ïpē'ēzani hã te za tô te te 're aipawaptob u'âsi za'ra wa'wa, hâiwa hawi dahâimanazém na rowaihu ïwê uptabi hã oto ãma waihu'u za'ra wa'aba da, taha zarina 'Re ïhâimana u'âsi mono te te sima 're aiwê za'ra wa'aba mono zé hã asina 're waihu'u za'ra wa'aba mono da oto, 'râwi.

¹⁰ Tawapsi, te za Wanhib'apito zazei'wa hâimanazéb zarina 're anomro wê wa'aba mono zém na, tãma ãma asina 're ï'uwaimrami za'ra wa'aba mo. Marĩ ïwê si 're 'manharĩ za'ra wa'aba mono wamhã, Wanhib'apito hã te za toi uptabi na aihâimanazém na te te 're ai'uzei pese za'ra wa'wa. Tawamhã 're aihâimana wê za'ra wa'aba mono zém hawi, te za tô marĩ 're ï'manharĩ wê za'ra wa'aba mono zém na asima 're ïsa'ētē za'ra wa'aba

mo. Tawamhã 'Re ãhâimana u'âsi mono hã ãwaihu'u za'ra wa'aba zém na te za duré asima 're ãsa'êtê za'ra wa'aba mo, asi'uihã na.

¹¹ Wa duré wa te tiwi aima 're rowaptêrê u'âsi za'ra wa'wa, 'Re ãhâimana u'âsi mono wi hã, ti-waihu'u pese na ãwê uptabi na si te te 're aipawap-tob za'ra wa'aba mono da, asiptete u'âsi ãma 're anomro aba mono da, taha na si. ãne wamhã, te za tô ato sina asiptete sina ãma 're anomro aba mo. Duré ãne wamhã, uburé marĩ na 're robzépata za'ra wa'aba mono nherê, asa dama ãma 're wa'rãmi za'ra wa'aba mono ô di za.

¹² ãne wamhã, Wamama ãma te za duré ãma 're aiwata u'âsi za'ra wa'aba mo. Ta hã ma tô aima pisutu za'ra wa'wa, hãiwa ãma tinhib'a'uwê norĩ ma, ãwê uptabi hã te te sô 're ã'apisutu mono hã aima wa'aba zama aima 're hâimana za'ra wa'aba mono da dasine, da'ãma 're ãsib'a'uwê mono zéb ãma hã rowa'a za'êne 're ãsa'wari u'âsi mono ãma hã.

¹³ Ta hã ma tô wa'anho'reptu tô, robra hawi, Satanasihi nhiptetezém hawi. Ta hawi ma tô te te 're wa'awaibu, ã'ra nhimi'madâ'â si oto tãma 're wahâimana za'ra mono da, tãma ãsawi uptabi nhimi'madâ'â si.

¹⁴ Tã'ra dâ'ázém na ma tô wa'awa'â, marĩ wa te 're ã'manharĩ wasété za'ra mono zé hã te te wama 're aparĩ mono da, taha zarina wawasédé hã te te wa'ãma 're ab'madâ'â tã mono da oto.

Cristu hã 're ãhâimana mono zé wasu'u

¹⁵ Cristu hã 'Re ãhâimana u'âsi mono ne, te tô 're mo, aiwa wa. Tane nherê, 'Re ãhâimana u'âsi mono hã datõmo na da te dasiwi 're 'madâ'â waihu'u za'ra mono ô di. ã'ra si ma tô da te dasiwi 're 'madâ'â za'ra datõmo na, tã'a 're morĩ ré hã. Ta hã duréihã marĩ ô uptabi ré hã, te tô 're hâimana u'âsi,

ĩ'ra hã. Uburé ropoto nhipai u, te ta hã pire uptabi na 're hâimana.

¹⁶ Ōhõ si ma tô Timama zadawa para uburé marĩ hã te te apoto, hâiwa âma, duré ti'ai âma zama, datõmo na da te 're ĩ'madâ'â za'ra mono hã, duré da te 're ĩ'madâ'â waihu'u za'ra mono õ zama. Uburé hâiwa nho're âma dapo're'õ norĩ ma simiroti pire na 're ĩhâimana za'ra mono norĩ zama ma tô te te apoto, ĩhâiba'õ norĩ hã. Uburé marĩ hã taha ma si 're hâimana za'ra mono da, ma tô te te ro'apoto tô, Timama zadawa para.

¹⁷ Cristu hã õne u'âsi te tô 're hâimana, marĩ õ uptabi ré hã. Ta hã te uburé marĩ hã tin-himipoto mono bâ te te 're atété tiwaihu'u pese na, si'wa'rutu na tiwi 're hâimana za'ra mono âna, tãma 're hâimana za'ra mono da, simisutu.

¹⁸ Ta hã uburé tizazei'wa norĩ 'madâ'â'wa te 're hâimana, pire uptabi na. Ta hã dapisutu'wa, 're ĩdapoto téb za'ra mono zéb da hã. Dâ'â nherẽ, apâ hâiwa'utu wa, te oto dama pire na 're hâimana u'âsi, uburé za ĩdahâiwa'utu za'ra norĩ nhipai u. Taha wa, te oto danhipai u pire uptabi na 're hâimana tô.

¹⁹ Re ĩhâimana u'âsi mono hã te te sima ĩwězéb zarina, ma tô ti'ra hã pisutu, ĩsine uptabi 're hâimana mono da, aiwa.

²⁰ Ma tô duré sima âma roti siro, ĩ'ra hã wedepo'o nhonhi'rãmi na dazada ĩdâ'âzém na oto da'âma 're siwadi mono da, uburé hâiwa âma 're ĩdahâimana za'ra mono norĩ âma hã, duré uburé ti'ai âma 're ĩdahâimana za'ra mono norĩ âma zama.

²¹ A norĩ wa'wa hã ma tô aré 'Re ĩhâimana u'âsi mono nhiti si 're anomro aba mo, aipẽ'ẽ 're wa'aba hã. Asitob'ru na ma tô âma 're ĩrosa'rata za'ra wa'aba mo aré, aipẽ'ẽ 're marĩ ĩwasété na si asima

're rosa'rata za'ra wa'aba mono wa. Duré marĩ ĩwasété si 're 'manharĩ za'ra wa'aba mono wa, ma tô aré ĩsiti 're aihâimana za'ra wa'aba mo.

²² Tane nherē, ĩ'ra hã dasiré a'uwē hâiba na dazada ĩdâ'âzéb zarina, te oto ai'ãma 're siwadi za'ra wa'wa, romhutu'õmhã sisõ're te te asõré wa'aba da, aiwasédé hã da te ai'ãma sa'ra waihu'u aba õ wa za tamemhã oto, Cristu hã tidâ'âzém na aiwasédé te te aima 're ĩ'apari aba mono zéb zarina.

²³ Taha wa, õne haré te za Cristuhu wasu'uwē si asina 're ĩ'umnhasi za'ra wa'aba mo asiptete sina, 'ri hã étē nhisiwi siptete na 're sa mono wa, simeĩ waihu'u õ na 're ĩsa mono ne. Te za tô ãma 're aihâimana u'âsi za'ra wa'aba mo, tiwi asina 're aipahã za'ra wa'aba mono ãna. ĩmorĩ'rata na Cristuhu wasu'uwē hã wapari na'rata za'ra wa'aba wamhã, ĩwē uptabi hã hâiwa ãma asô 're ĩsimi'wara aba mono wasu'u wi, tiwi asina 're ai'ré za'ra wa'aba mono õ di za, sô 're asimipari za'ra wa'aba mono wasu'u wi hã. ãhã wasu'uwē hã ropã ma tô da te dasima 're wasu'u za'ra, da te 're waihu'u za'ra mono da. Duré wa hã Paru, wa ãhã wasu'uwē na te dama 're romhuri u'âsi.

Paru hã ĩsazei'wa norĩ te te 're ĩpawaptob za'ra mono zé wasu'u

²⁴ Wa hã ai'udãna za'ra wa'aba, te ai'ãma 're robzépata za'ra wa'aba mono nherē, wa ĩto sina 're ĩhâimana. Cristuhu ma si, te 're romhuri mono wa, wa tô te 're robzépata za'ëtē tô, ta hã ti'ai ãma 're morĩ ré, dazada te te ĩrobzépata ne. Tane nherē, Cristuhu nhib'a'uwē norĩ ma, ĩnhimiromhuri na te tãma ãma 're uwaimrami mono da, wa za tô taha na te 're robzépata u'âsi.

25 'Re ìhâimana u'âsi mono hã ma tô ìpisutu, ìsib'a'uwẽ norĩ te tãma 're apawapto mono da. Ai'udâna za'ra wa'aba te 're romhuri mono da, ma tô romhuri hã ìma tisõ, uburé ìsadawa wasu'uwẽ na te aima 're rowasu'u za'ra wa'aba mono da.

26 Æhã wasu'u hã 'Re ìhâimana u'âsi mono, ìsãna'rata hawimhã te te aré dama 're ì'awaihu'u mono õ hã ma tô oto sõ'awi dama upsibi nhamra, tinhib'a'uwẽ norĩ ma si.

27 'Re ìhâimana u'âsi mono hã ma tô sima ãma roti, ãhã wasu'u hã ìwẽ uptabi hã aré da te 're ìwaihu'u za'ra mono õ hã te te oto dama awasu'u hãiré da sõ'awi, dapoto mono bâ da te oto 're waihu'u za'ra mono da, zudezu'õ norĩ zama. Æhã wasu'u hã aré da te 're ìwaihu'u za'ra mono õ hã, ãne: Cristu hã te oto aipẽ'ẽ 're, 're sãmra za'ra wa'wa. Taha wa, te za tô taha zô si 're asimipari za'ra wa'aba mo, 'Re ìhâimana u'âsi mono, ìwẽ uptabi hã za te te wama 're ì'apisutu mono zô si. Æne 'Re ìhâimana u'âsi mono wasu'u hã, ã hã aré da te 're ìwaihu'u za'ra mono õ hã.

28 Taha wa, Cristuhu si wa oto wa te dama 're wasu'u za'ra. Hãiwa hawi dahâimanazém na rowaihu ìwẽ hã wa te 're ìwaihu'u za'ra mono zéb zarina, wa tô wa te 're da'uwati wẽ za'ra dahâiba mono bâ, marĩ hã da te 're 'manharĩ wasété za'ra mono tõ da. Wa tô duré wa te dama 're roti za'ra, marĩ da te 're 'manharĩ wẽ za'ra mono da, ì'uwaibaba si. Ni'wam norĩ hã Cristuhu ãma prédup sina 're ìnomro mono norĩ hã 'Re ìhâimana u'âsi mono nho're u, wa te 're simroi mono da, wa tô ãne hã wa te dama 're roti za'ra, rosa'rata wẽ hã wa te oto 're ìwaihu'u za'ra mono zém hawimhã.

29 Æne da, wa tô 're ìsi'wapéi u'âsi, ìnhiptete sina te tãma 're romhuri mono da. Cristu hã

tinhiptetezé te te ĩma 're sōmri mono wa, wa ĩré te āma 're romhuri pese, taha na si 're ĩnhiptete uptabi mono wa.

2

¹ Wa hã wa ĩsima wẽ āne hã, te ai'āma 're ĩromhuri pese za'ra wa'aba mono na asiwi ĩwaihu'u za'ra wa'aba da, ĩhãiba pibu za'ra wa'aba õ nherẽ. Duré Radiseza na 'ri nõ'õmo nhisi āma ĩsazei'wa norĩ 're ĩsi'ubumroi mono norĩ āma te 're ĩromhuri pese mono na asiwi ĩwaihu'u za'ra wa'aba da, wa duré ĩsima wẽ, daro mono bâ ni'wam norĩ āma te duré 're ĩromhuri pese mono na zama, uburé te te ĩhãiba pibu za'ra õ norĩ āma hã.

² Ta norĩ hã tipẽ'ẽzani wẽ ré, siptete sina 're hãimana za'ra mono da, wa tô te āma 're romhuri pese za'ra. A norĩ wa'aba āma zama wa tô duré te 're romhuri pese, aipẽ'ẽzani wẽ ré asiptete sina 're aihãimana za'ra wa'aba mono da. Taha wa, te za 'rãwi simisutu siré 're hãimana za'ra ta norĩ hã, 're ĩsisawi pese za'ra mono zéb zarina. A norĩ wa'aba zama te za duré āne zarina simisutu asiré 're aihãimana za'ra wa'aba mo. Tawamhã, 'Re ĩhãimana u'ãsi mono wasu'u wẽ hã aré dama ĩwaihu'u'õ hã te te oto waihu'u pese za'ra wa, te za tô sena na te te 're waihu'u za'ra, a norĩ wa'aba zama. 'Re ĩhãimana u'ãsi mono wasu'u hã aré dama ĩwaihu'u'õ hã, ā hã Cristuhu wasu'u wẽ, te dama wasu'u.

³ Cristu hã rowasu'u aré dama ĩwaihu'u'õ na 'Re ĩhãimana u'ãsi mono nhimiroti wẽ wasu'u waihu'u'wa, ta hã. Ētẽ'ubuzi ĩwa'ãbã za'ene hã ti'ai 'rowi 're simi'wara mono nherẽ, da te oto 're ĩsõpẽtẽ za'ra mono ne, ma tô Cristu hã te te dama

're wasu'u hâi're sô'awi, 'Re ãhâimana u'âsi mono nhimiroti wê wasu'u hã.

⁴ Ni'wam norĩ hã roti senai'õ na taré te te aima 're ãrowasu'u za'ra wa'aba mono hã wapari ze nherẽ, ãma 're saze za'ra wa'aba mono tã da, wa ãne na aima nharĩ za'ra wa'wa.

⁵ Ai'rata ãnhamra aba õ nherẽ, ãpẽ'ẽ na wa tã te ai'ãma 're rosa'rata u'âsi za'ra wa'wa, 'rãwi asiré 're ãhâimana za'ra wa'aba mono ne. Cristu hã asina 're ã'umnhasi za'ra wa'aba mono zém na, simisutu asiré 're aihâimana nhiptete za'ra wa'aba mono wa, wa ai'ãma 're ãtoi u'âsi za'ra wa'wa, romhã na nherẽ.

Cristuhu ãma 're ãdanomro mono zé wasu'u

⁶ Taha wa, Cristu Zezusi hã Asib'apito za'ra wa'aba na 're saze za'ra wa'aba mono wa, ma'ãpé simisutu ãsiré ãma 're aihâimana u'âsi za'ra wa'aba mono za, 'rãwi.

⁷ Rowede hã sari pa na 're simasa mono wamhã, 're sina waihu'u mono õ di. Tane duré a norĩ wa'wa hã Cristu te te 're ã'aipawaptob za'ra wa'aba mono zéb zarina si, te za aihâimana nhiptete sina ãma 're aihâimana za'ra wa'aba mo. Tawamhã taha si asina 're ã'umnhasi za'ra wa'aba mono zém na te za asima 're ãsa'ëtẽ za'ra wa'aba mo, Cristuhu wasu'uwẽ na tã sena da te aima ãma 're ãrowasu'u za'ra wa'aba mono zéb zarina. Te za duré ãma 're aiwata u'âsi za'ra wa'aba mo, 'Re ãhâimana u'âsi mono ãma, Cristuhu nhimipawaptobzéb zarina.

⁸ Taha wa, te za 're asi'madã'ã pese za'ra wa'aba mo, dasi'uihã na senai'õ na ãanhimirosa'rata nhipese na da te aima 're roti za'ra wa'aba mono wamhã, ãma 're ãazaze za'ra wa'aba mono tã da, tã sena newa taha ãma si 're aihâimana za'ra wa'aba mono tã da. Ni'wam norĩ hã ãanhimiwada'uri

zarina pawa'âbâ âna te te dama 're ãromhuri za'ra mono ne, robzei'õ na apâ 're aihâimana za'ra wa'aba mono õ'umnhasite, te za dawî 're asi'madâ'â pese za'ra wa'aba mo. Danhimirosa'rata nhipe hã Cristuhu hawib õ di. Dahi'rata sidâpâsi tô senai'õ na taré da te dasima 're ãroti za'ra mono zém hawimhã ta hã, duré ãhãiba'õ norĩ hã wasété uptabi na 're ãhãimana za'ra mono norĩ hã ropâ siptete sina marĩ te te 're ã'madâ'â za'ra mono hawimhã, danhimirosa'rata nhipe hã.

⁹ Cristu hã ti'ai âma a'uwẽ hãiba na 're morĩ ré, te tô 'Re ãhãimana u'âsi mono ne 're hãimana, aiwa uptabi wa. Taha wa, marĩ zô tiwi 're rowaptâ'â mono õ di, Cristuhu wi hã.

¹⁰ Tane duré a norĩ wa'wa hã, Cristuhu âma 're anomro aba mono wa, marĩ zô aiwi 're rowaptâ'â za'ra wa'aba mono õ di, rowẽ na âma 're ã'anomro u'âsi aba mono zéb da hã. Cristu hã uburé ãhãiba'õ norĩ 'madâ'â'wa norĩ nhipai u, te pire uptabi na 're hãimana u'âsi, siwaprosi õhõ si.

¹¹ Zudezu norĩ hã te 're sisihãiwata nhihãri za'ra, 'Re ãhãimana u'âsi mono nhib'a'uwẽ 're ãnomro mono na da te âma 're ãwaihu'u za'ra mono zéb da hã. Tane duré, wa norĩ hã Cristuhu âma oto 're wanomro mono wa, ta hã ma tô wapẽ'ẽ 're wanhimirosa'rata wasété na 're ãwanomro wasété mono zé hã te te wawi 're anhihãri, wawẽ na si oto âma 're wahãimana za'ra mono da.

¹² Â dawabzuri hã 're 'manharĩ za'ra wa'aba mono wanhã, â da te 're asãmra aba mono zé hã, Cristuhu siré 're atâ'â za'ra wa'aba mono zé, te ai'ãma simiré'é za'ra wa'wa. Ab're 're, ãsiré da te 're aséme aba mono zéb zama, te ai'ãma simiré'é za'ra wa'wa. Ta hã 're anomro 'rata aba mono zé hã oto 're ãrẽme pese za'ra wa'aba mono zé, te

aima wasu'u za'ra wa'wa. Duré Cristu hã dâ'â uptabi nherẽ, Ìmama hã tiwaihu'u pese na te te ìhâiwa'utu ne, ma tô duré ìsiré aihâiwa'utu za'ra wa'wa. Ìsiré 're aihâiwa'utu za'ra wa'aba mono zé hã 're anomro aba mono zép té, te oto aima wasu'u za'ra wa'wa. 'Re ìhâimana u'âsi mono hã ìwaihu'u pese na asina 're ì'umnhasi za'ra wa'aba mono zéb zarina, ma tô ãne hã aima pisutu za'ra wa'wa, taha ãma si 're anomro aba mono zép téb da hã oto.

¹³ A norĩ wa'wa hã aipẽ'ẽ 're, 're atâ'â za'ra wa'aba mono ne, ma tô aré 're anomro aba mo, aiwasété si 're 'manharĩ u'âsi za'ra wa'aba mono wa, duré 'Re ìhâimana u'âsi mono nhiti 're aihâimana u'âsi za'ra wa'aba mono wa aré. Taha ré, ma tô oto 'Re ìhâimana u'âsi mono hã te te aima 're pisutu za'ra wa'wa, 're anomro aba mono zép téb da hã, aipẽ'ẽ 're ato sina ãma 're anomro u'âsi aba mono da, Cristu hã dâ'â uptabi nherẽ, apâ te te ìhâiwa'utu ne. Taha wa, wawasédé wa te 're ì'manharĩ za'ra mono zé hã te te oto wa'ãma 're ab'madâ'â mono õ di za, ta hã.

¹⁴ Wawasédé wa te 're ì'manharĩ za'ra mono zém na te te aré wa'ãma sima ìrob'ui'éré za'ra zé hã ma tô te te wama 're apari, wawasété na wa te aré tãma 're ìwa'âbâ za'ra mono õ na wa'ãma rob'ui'éré hã. Ìsimiroti hã wa te wasina ãma 're ì'uwaimrami za'ra mono õ zarina, wawasété na te te wa'ãma 're ì'arob'ui'éré mono zé hã ma tô te te wama 're a'uprosi oto. Niha 're ìdahâimana za'ra mono zéb da, duréihã te te dama 're ì'aroti 'rata mono hã ma tô duré te te dama 're a'uprosi oto. Cristu hã wedepo'o nnonhi'rãmi na wazada ìdâ'âzém na ma tô te te wama 're a'uprosi tô.

¹⁵ Uburé hâiwa nho're ãma ìhâiba'õ norĩ nhiptetezé hã ma tô tiwi uprosi za'ra 'Re ìhâimana

u'âsi mono hã, dapo're'õ norĩ ma simiroti pire na tãma 're ãhãmmana za'ra mono norĩ nhiptetezẽ hã arẽ. Da'wapẽi'wa norĩ nhib'apito hã tinhitob'ru norĩ ãma te te ai'uté za'ra wẽ te, da'ahã nho'a sisarina te te ãsimroi mono ne, ma tã danho'a ta norĩ ãma ai'uté za'ra, wedepo'o nhonhi'rãmi na Cristuhu dã'ãzẽm na hã, Cristuhu ma wapu na 're ãhãmmana za'ra mono na, uburẽ da te oto 're waihu'u za'ra mono da.

16 Átẽ ni'wam norĩ hã te za ãne na te te aima 're roti za'ra wa'wa: “Romnhi hã siwa'ru 're huri aba mono õ di za. Durẽ uwa 'ru 'rã wa'u ãsẽ hã siwa'ru bãtã na 're ahuri aba mono õ di za. Durẽ sabadu na romhuri zahãrizẽm na 're romhuri za'ra wa'aba mono õ di za. Durẽ a'amo hã 're pusi mono sidãpãsi, 'Re ãhãmmana u'âsi mono ma, dato da te tãma 're 'manharĩ za'ra mono wamhã, te za dame 're ã'madã'ã pese za'ra wa'aba mo. Bãdã ahã na pire na dama 're ãhãmmana za'ra mono zama, te za dame 're ã'madã'ã pese za'ra wa'aba mo, 'Re ãhãmmana u'âsi mono ãma 're ãdawata za'ra mono zẽb da, dama ãpire mono hã. ãne hã asina tãma ãma 're uwaimrami za'ra wa'aba mono wapsi, te za 'Re ãhãmmana u'âsi mono hã te te 're aiwẽsãmri za'ra wa'wa.” ãne na ni'wam norĩ hã te te aima 're roti za'ra wa'aba mono wamhã, ãma 're saze za'ra wa'aba mono õ di za, dasi'uihã na danhimi'manharĩzẽm hawi 'Re ãhãmmana u'âsi mono hã te te 're da'awẽsãmri mono dai õ wa.

17 Da'awã da te 're 'madã'ã za'ra mono wamhã, dahãiba uptabi hã dama 're ãhãmmana za'ra mono na te za da te 're waihu'u za'ra. Tane nherẽ, da'awã si hã marĩ ãma 're hãmmana mono õ di, ãpire hã. Tane durẽ, danhimiroti zarina uburẽ danhimi'manharĩzẽ mono hã. Marĩ ã'uptabi hã

dama ãma 're hâimana za'ra mono õ di. Īwẽ hã za dama 're ĩhâimana za'ra mono zép si, te wasu'u. Marĩ ĩwẽ uptabi hã, ta hã Cristu te tô wama wasu'u za'ra, taha si.

18 Áté ni'wam norĩ hã te za sadawa nhipese na dama 're siwasu'u za'ra, dama wapu na 're ĩhâimana za'ra mono na, 'râwi 're si'madâ'â ze za'ra mono nherẽ. Áté te za duré ta norĩ hã hãwi ãma romhuri'wa norĩ ãma si 're wata za'ra, 'Re ĩhâimana u'âsi mono upana. Tawamhã áté ta norĩ hã te za aima roti za'ra wa'wa, ãne: “A norĩ wa'wa hã wasine 're aihâimana za'ra wa'aba mono õ wamhã, 'Re ĩhâimana u'âsi mono hã ĩwẽ uptabi hã te te aima sômri za'ra wa'aba õ di za. Te za ĩsimini za'ra wa'wa.” Áne na ta norĩ hã te te aima 're nharĩ za'ra wa'aba mono wamhã, ãma 're saze za'ra wa'aba mono õ di za. Tô'ã. Ta norĩ hã marĩ aimawi hã dama ĩwaihu'u'õ hã sôtõ 'rowim ne, te te 're ĩsabu za'ra mono na dama 're ĩsiwasu'u za'ra mono na, te 're si'madâ'â ze za'ra, dama pire na 're hâimana za'ra mono newa, 'Re ĩhâimana u'âsi mono waihu'u'õ'wa norĩ nhimirosa'rata wasété zarina.

19 Ta norĩ hã Cristuhu wasu'uwẽ si te te sima 're tété za'ra mono õ di. Cristu hã uburé tizazei'wa norĩ 'madâ'â'wa te pire na 're hâimana taha si, da'rã hã dahâiba ma pire na 're ĩhâimana za'ra mono ne. Dahâiba na danhorõ 're ĩhâimana za'ra mono hã te dahi hã te te sitême 're tété tete za'ra, danhiptete sina ãma 're dahâimana za'ra mono da, dahâiba na hã. Tane duré Cristu hã te za tinhib'a'uwẽ norĩ hã te te 're apawapto, ta norĩ hã 're sipawapto za'ra mono da, siptete sina ãma 're hâimana u'âsi za'ra mono da. Te za duré te te 're apawapto, prédup sina ãma 're ĩhâimana za'ra mono zém na te te sima 're sa'êtê u'âsi za'ra mono da, 'Re ĩhâimana u'âsi

mono te te tãma 're ã'awẽ mono zéb zarina.

Cristuhu siré 're ãdahãwa'utu za'ra mono zé wasu'u

²⁰ Cristu hã dã'ã wamhã, 're anomro 'rata aba mono zé hã ma tô ãsiré aiwi ai'utõrĩ za'ra wa'wa. Taha wa, ti'ai ãma danhimiroti zarina 're aihãimana za'ra wa'aba mono õ di za oto, taha zarina 'Re ãhãimana u'ãsi mono te te 're aiwẽsãmri za'ra wa'aba mono dai õ wa. Ta hã tâibã oto. Ta hawi ma tô ãhawi aiwairébé 'wa. E marĩ da, te bété zahadu ãne hã ãsazei'õ'wa norĩ nhimiroti hã asina 're ãsazei pese za'ra wa'aba mo, taha na zahadu 're aihãimana za'ra wa'aba mono õ nherẽ.

²¹⁻²² Ni'wam norĩ hã te ãne te te aima 're roti za'ra wa'wa, 'Re ãhãimana u'ãsi mono nhimiroti na newa: “Ã hã dasa hã asib'rata na ãri õ di za, wasété wa. Duré ã hã téiwai õ di za, asadawa na. Duré ã hã asib'rata na upi tõ. Wasété uptabi di.” ãne hã te ni'wam norĩ hã dasa na te te aima 're roti wasété za'ra wa'wa, 're upi za'ra wa'aba mono tõ da. Tane nherẽ, dasai mono bã dama 're hãimana hutu za'ra mono di. Taha wa, dasa da te dasiwi 're ãsawi za'ra mono zém na roti hã tarére duré. Marĩ dai õ di ãne hã, 'rãwi dasi'uihã na da te dasima 're ãrosa'rata za'ra mono zé hã.

²³ Dasa na te te dama 're ãroti wasété za'ra mono norĩ hã waihu'u pese newa, te ta norĩ ãma da te 're sasõmri za'ra. Tane nherẽ, ta norĩ hã waihu'u pese na 're hãimana za'ra mono õ di. Ta norĩ hã te ãne te te 're dawada'uri za'ra, hãiwa ãma 'Re ãhãimana u'ãsi mono ma romhuri'wa norĩ ãma si 're dawata za'ra mono da, 'Re ãhãimana u'ãsi mono upana. Ta norĩ hã 'rãwi sina 're wata u'ãsi za'ra mono nherẽ, te dama wapu na 're ãhãimana za'ra mono na dama 're siwasu'u za'ra, sadawa nhipese na. Dasa hã

te te siwi 're ãwẽ'õ za'ra mono na te ta norĩ hã te te 're robzépata za'ra tihãiba na, 'Re ãhãimana u'ãsi mono hã taha zarina te te 're wẽsãmri za'ra mono da newa. Tane nherẽ, taré uptabi ta hã. Marĩ dai õ di, dasi'uihã na dasai mono bã da te dasima 're ãroti za'ra mono zé hã. E dasi'uihã na da te dasima 're ãroti za'ra mono na 're wahãimana za'ra mono wa, wa za wa te wasina ãma 're uwaimrami za'ra, wanhimirosa'rata wasété zarina marĩ ãwasédé hã wa te 're 'manharĩ za'ra mono tõ da. Mare di. Sib'uware di, marĩ da, wama 're hãimana za'ra mono õ wa, ta hã.

3

¹ Cristu hã dã'ã uptabi nherẽ, 'Re ãhãimana u'ãsi mono te te apã ãhãiwa'utu ne, ma tõ a norĩ wa'aba zama aihãiwa'utu za'ra wa'wa, aipẽ'ẽ 're atã'ã u'ãsi ne 're aihãimana za'ra wa'aba mono zém hawi, 're anomro aba mono zép téb da hã oto. Taha wa, ma'ãpé ãwẽ uptabi hã hãiwa ãma asõ 're ãsimi'wara aba mono zõ si, 're rob'ruiwapari u'ãsi za'ra wa'aba mono za. Tame te oto Cristu hã danhib'apito simasisizéb ãma 're sãmra u'ãsi pire na, Timama nhimire niwĩ, 'Re ãhãimana u'ãsi mono nhimire niwĩ.

² Hãiwa ãma uburé marĩ wẽ uptabi na 're ãhãimana za'ra mono na si, te za asima ãma 're ãrosa'rata u'ãsi za'ra wa'aba mo. ãme ti'ai ãma uburé marĩ 're ãhãimana za'ra mono na asima 're rosa'rata za'ra wa'aba mono õ di za oto.

³ 'Re anomro 'rata aba mono zé hã ma tõ aima ai'utõrĩ za'ra wa'wa oto. 'Re ãhãimana u'ãsi mono ãma Cristuhu siré 're anomro aba mono zép tém na da te ai'ãma 're rosa'rata waihu'u za'ra wa'aba mono õ di zahadu. E marĩ wa. 'Re ãhãimana u'ãsi

mono hã zahadu te te dama 're awaihu'u mono õ wa, ãne na hã.

⁴ Cristuhu ãma si tô sena 're wahâimana za'ra mono wamhã, taha na si ãma 're ãwanomro mono zép té, te wama wasu'u za'ra. Ta hã nimahã na tinhimirowa'a na ti'ai u apâ wei morĩ wamhã, a norĩ wa'wa hã te za duré danho'a ãsiré aihâimana za'ra wa'wa, ãsine aiwẽ uptabi na 're aihâimana za'ra wa'aba mono na, da te ãma aiwaihu'u za'ra wa'aba da hã.

'Re ãdanomro mono zép té wasu'u

⁵ Ti'ai ãma ãsazei'õ'wa norĩ hâimanazéb zarina, marĩ wasété zô 're ãrob'ruiwapari za'ra wa'aba mono zé hã te za asiwi 're ã'uprosi pese za'ra wa'aba mo asiwi, 're dadâ'ã za'ra mono wa, marĩ zô da te oto 're ãrob'ruiwapari za'ra mono õ ne. Pi'õ na aibã na zama siwa'ru aiwasédé, 're ã'manharĩ za'ra wa'aba mono zé hã te za 're ã'uprosi pese za'ra wa'aba mo asiwi, duré asisô 're ãrowasutu za'ra wa'aba mono zé hã, duré marĩ wasété zô si asima 're ãrob'ruiwapari za'ra wa'aba mono zé hã, duré danhipai u asibro pese na 're aihâimana za'ra wa'aba mono da, marĩ zô si asima 're asõpré wa'aba mono zé hã. ãne hã 'Re ãhâimana u'ãsi mono ma, wẽ õ di, marĩ zô ã'upana asima 're ãrob'ruiwapari za'ra wa'aba mono zé hã. Taha wa, te za tô uburé aiwasédé hã asiwi 're ã'uprosi pese za'ra wa'aba mo, aiwi 're si'utõrĩ pese za'ra wa'aba mono wa, 're anomro wẽ wa'aba mono da oto.

⁶ ãne hã dawasété si, da te dasima 're ã'ruiwapari za'ra mono zéb zarina, te za 'Re ãhâimana u'ãsi mono hã dama arob'manharĩ za'ëtẽ ãpipa na hã, te te siwi ãda'awẽ'õ pese zéb zarina.

7 A norĩ wa'aba zama ma tô aré ãne na 're aihâimana za'ra wa'aba mo, aiwasété si asima 're ĩruiwapari za'ra wa'aba mono zéb zarina, aré ãma 're aihâimana za'ra wa'aba mono ré hã.

8 Taha wa, te za uburé marĩ hã 're ĩ'manharĩ wasété za'ra wa'aba mono zé hã ĩrême pese za'ra wa'wa oto, 're ĩda'ruiwapari za'ra wa'aba mono zé hã, duré asisada 're asiti'ru za'ra wa'aba mono zé hã, duré niha dama 're rob'manharĩ za'ra wa'aba mono da, asima da'ãma 're ĩrosa'rata wasété za'ra wa'aba mono zé hã, duré da'ãma 're ĩwasété za'ra wa'aba mono zé hã, duré uburé aimreme wasété 'wa hã. Ā norĩ hã te za uburé ĩrême pese za'ra wa'wa.

9 Taré asima 're asadawa nhipese za'ra wa'aba mono õ di za oto, 're anomro 'rata aba mono zé hã 're rême pese za'ra wa'aba mono nherẽ, uburé aiwasédé 're ĩ'manharĩ za'ra wa'aba mono zé hã.

10 Taha wa'rãmi, te oto 're ĩdanomro mono zép tém na si 're anomro aba mo, ĩwẽ na. 'Re ĩhâimana u'âsi mono, ma tô te te 're aipoto téb za'ra wa'wa aipẽ'ẽ 're, ĩsine 're aihâimana u'âsi za'ra wa'aba mono da oto, taha zarina õhõ si 're waihu'u pese za'ra wa'aba mono da.

11 Taha wa, dapoto mono bâ dasipu'u pese na tãma 're dahâimana za'ra mono nherẽ, te te siwi 're da'ahâiba wẽ'õ mono õ di oto, 'Re ĩhâimana u'âsi mono hã. E marĩ wa. Cristuhu zazei'wa norĩ hã aiwapsi te te 're azawi pese mono wa, zudezu'õ norĩ hã zudezu norĩ me, duré sihâiwata nhihâri ré 're ĩnomro mono norĩ hã, duré sihâiwata nhihâri ãna 're ĩnomro mono norĩ hã, duré a'uwẽ pahi norĩ, marãi 'rowi 're ĩhâimana za'ra mono hã darob amoi ãma, duré ĩwada'uri zarina si pawa'âbâ ãna te te dama 're ĩromhuri za'ra mono norĩ hã, duré wada'uri ãna

si'uihâ na 're ãhâimana za'ra mono norĩ hã. ãne hã te uburé ãsazei'wa norĩ hã aiwapsi tãma 're hâimana za'ra, 'Re ãhâimana u'âsi mono ma hã. Cristuhu si te pire uptabi na wama 're hâimana za'ra, danhipai u. Taha si wama ãpire uptabi za'ra hã, wasiré ãsazei'wa norĩ ma hã. Taha si te za tizazei'wa norĩ pẽ'ẽ 're, 're sãmra, ãhâiba mono bâ.

¹² A norĩ wa'wa hã 'Re ãhâimana u'âsi mono nhib'a'uwẽ, te tô 're aihâimana za'ra wa'aba mo. Ta hã te te 're asawi pese za'ra wa'aba mono wa, ma tô sima aipisutu za'ra wa'wa, taha ma si tãma 're aihâimana za'ra wa'aba mono da oto. Taha wa, da te 're robzépata za'ra mono wamhã, te za da'ãma 're aiwamri za'ra wa'aba mo. Te za duré 're ãdapawapto wẽ za'ra wa'aba mo. Asiré norĩ ma, aipire na 're aihâimana za'ra wa'aba mono na, 'rãwi 're asi'madã'ã ze za'ra wa'aba mono õ di za. Aiwaimri te za dama 're aihâimana za'ra wa'aba mo. Duré aiwara sina dazada 're asahi za'ra wa'aba mono õ di za.

¹³ Ni'wam norĩ hã asiré nherẽ, marĩ na te te aiwi 're ro'wa'rẽ za'ra wa'aba mono nherẽ, ãma 're aiwa'a za'ra wa'aba mono õ di za, ta norĩ ãma hã. Duré marĩ na te te aiwi 're ro'wa'rẽ za'ra wa'aba mono nherẽ, ãma 're 'madã'ã u'âsi za'ra wa'aba mono õ di za. Wanhib'apito hã aiwasédé te te oto ai'ãma 're ã'ab'madã'ã aba mono õ ne, ãma 're 'madã'ã za'ra wa'aba mono õ di za, ta norĩ ãma hã.

¹⁴ Danhipai u, dama ãpire uptabi na roti hã, ãne: Te za 're asisawi pese za'ra wa'aba mo. Taha zarina si, te za uburé asiré ãsazei'wa norĩ hã rowẽ na asiré 're aihâimana za'ra wa'aba mo, aihâiba za'ra wa'wa hã misi ne.

¹⁵ Cristu hã te za te te 're aipawapto u'âsi za'ra wa'wa, rowẽ na asiré ãma 're aihâimana za'ra

wa'aba mono da. Taha wa, te za aipě'ě 're ĩré 're anomro u'âsi aba mo, uburé marĩ hã ĩ'uwaibaba si âma 're ĩ'manharĩ za'ra wa'aba mono zéb da hã, 'râwi asina 're waihu'u za'ra wa'aba mono da. 'Re ĩhâimana u'âsi mono hã ma tô aipisutu za'ra wa'wa, simisutu dahâiba misi ne, asiré 're aihâimana za'ra wa'aba mono da, taha zarina aipě'ě 're rowě na asiré 're aihâimana za'ra wa'aba mono da, âma. Taha wa, te za âma 're aiwata u'âsi za'ra wa'aba mo, 'Re ĩhâimana u'âsi mono âma si.

¹⁶ Cristuhu wasu'uwě na te za âma 're asipo're pu'u u'âsi za'ra wa'aba mo, aipě'ě 're aima 're hâimana u'âsi za'ra wa'aba mono da, taha zarina aihâimana wě na 're anomro aba mono zé hã asima 're sa'ětě za'ra wa'aba mono da oto. 'Re ĩhâimana u'âsi mono hawi, dahâimanazém na rowaihu ĩwě hã âma 're ĩwaihu'u za'ra wa'aba mono zéb zarina, te za dama âma 're ĩroti pese za'ra wa'aba mo. 'Re ĩhâimana u'âsi mono hã sōprub uptabi wa, te za tãma 're asō're u'âsi za'ra wa'aba mo, aipě'ě 're âma 're aiwata za'ra wa'aba mono sina. ĩpě'ězani te te aima 're ĩwaihu'u za'ra wa'aba mono zém na, te za rowě zarina tãma 're asō're za'ra wa'aba mo, Saumusi na ĩbaihâ nhisi na tãma 're ĩdanho're za'ra mono zém na zama, duré Wanhíb'apito âma 're ĩdanho're za'ra mono na zama.

¹⁷ Uburé marĩ hã 're 'manharĩ za'ra wa'aba mono wamhã, duré uburé marĩ na 're aimreme zusi aba mono wamhã, Wanhíb'apito Zezusihi zadawa para si, te za uburé marĩ hã 're ĩ'manharĩ wě u'âsi za'ra wa'aba mo. Tawamhã Zezusi hã ĩwě uptabi hã wanhowa te te ĩ'manharĩ wě zéb zarina, te za tô marĩ hã 're ĩ'manharĩ wě u'âsi za'ra wa'aba mo, Wamama 'Re ĩhâimana u'âsi mono âma 're aiwata za'ra wa'aba mono sina.

'Ri 're, 're ĩdahâimana za'ra mono norĩ ma rotizé wasu'u

¹⁸ Pi'õ norĩ, aimro nhimiroti hã te za 're ĩwapari pese za'ra wa'aba mo, Cristuhu zazei'wa tô sena ãma 're ĩhâimana za'ra mono zéb zarina.

¹⁹ Aibâ norĩ, aimro te za 're ĩsawi pese za'ra wa'aba mo. Tãma 're aihâimana wasété za'ra wa'aba mono ãna, te za asima 're ĩsawi pese za'ra wa'aba mo.

²⁰ Ai'uté norĩ, aimama nhimiroti te za 're ĩwapari pese za'ra wa'aba mo, ana nhimiroti zama, Cristuhu zazei'wa oto 're ĩhâimana za'ra mono zéb zarina. E marĩ wa. 'Re ĩhâimana u'âsi mono hã te te aima 're wẽ za'ra wa'aba mono wa, ãne hã.

²¹ Damama norĩ, ai'ra norĩ ma, ai'aba're na aimreme hã 're sani za'ra wa'aba mono õ di za, ta norĩ hã te te sina 're aimreme wazéb za'ra wa'aba mono wa, tiwi 're robzei'õ pese za'ra mono tõ da.

²² Aiwada'uri zarina si, aipawa'âbâ ãna dama romhuri'wa norĩ, ti'ai ãma asib'apito norĩ mreme hã te za 're ĩwapari pese za'ra wa'aba mo. E asib'apito norĩ hã 'rãwi titõmo na te te 're ai'madâ'â za'ra wa'aba mono wapsi, te za romhuri hã tãma 're ĩ'madâ'â pese za'ra wa'aba mo, asimiromhuri na te te 're aiwêsãmri za'ra wa'aba mono zéb da hã. Mare di. ĩhâiba za're'ra nherẽ, te za tô romhuri hã tãma 're ĩ'madâ'â pese za'ra wa'aba mo, Wanhib'apito hã asiwi 're ĩwazéb za'ra wa'aba mono zéb zarina.

²³ Ato sina te za tô tãma 're ĩromhuri u'âsi za'ra wa'aba mo asib'apito norĩ ma, hãiwa ãma Wanhib'apito 're ĩsãmra mono ma, ato sina 're ĩromhuri za'ra wa'aba mono ne.

²⁴ Aipawa'âbâ aba zé hã hãiwa ãma asô 're ĩsimi'wara aba mono hã, Wanhib'apito hã za te

te aima ĩsõmri za'ra wa'aba na asina waihu'u sirõmo za'ra wa'aba wa, te za ãne hã tô sena ti'ai ãma asib'apito norĩ ma 're ĩromhuri wẽ u'âsi za'ra wa'aba mo. Tane nherẽ, ta norĩ ma si 're romhuri za'ra wa'aba mono õ di. Ta norĩ u'âbâ, te Wanhib'apito Cristuhu ma zama 're ĩromhuri za'ra wa'aba mo, ta hã Wanhib'apito uptabi wama 're hâimana mono wa.

²⁵ Ni'wam norĩ hã tiwasété si te te 're 'manharĩ u'âsi za'ra mono wamhã, taha wa'rãmi te za 'Re ĩhâimana u'âsi mono hã hã za'ra, nimahã na hã. E marĩ wa. Ni'wam norĩ hã po're'õ na 're nomro u'âsi mono nherẽ, tinhimihâzé te te tãma ba'a waihu'u za'ra õ wa za, 'Re ĩhâimana u'âsi mono hã, dama pire na 're ĩhâimana za'ra mono norĩ hã, dama wapu na 're ĩhâimana za'ra mono norĩ zama.

4

¹ Danhib'apito norĩ, pawa'âbâ ãna aima romhuri'wa norĩ ma, te za 're ĩ'manharĩ wẽ u'âsi za'ra wa'aba mo, ĩ'uwaibaba si. Asib'apito za'ra wa'wa hã hãiwa ãma 're ĩsãmra mono hã te te 're ai'madâ'â u'âsi za'ra wa'aba mono na, asina 're waihu'u za'ra wa'aba mono wa, te za ãne na hã tãma 're ĩ'manharĩ wẽ u'âsi za'ra wa'aba mo, aima romhuri'wa norĩ ma hã.

'Re ĩhâimana u'âsi mono ma, 're damreme zusi mono da, rotizé wasu'u

² 'Re ĩhâimana u'âsi mono ma, te za 're aimreme zusi aba mo, õne u'âsi. Asimiza'rese te za tãma 're aimreme zusi aba mo, ãma 're aiwata za'ra wa'aba mono sina.

³ 'Re ĩhâimana u'âsi mono ma, 're aimreme zusi aba mono wamhã, wa'ãma zama te za duré tãma 're aimreme zusi aba mo, ta hã te te wama 're

a'ridawa mono da, ĩmreme wasu'u hã wa te dama 're wasu'u za'ra mono da, Cristuhu wasu'uwẽ aré dama ĩwaihu'u'õ hã wa te dama 're waihu'u za'ra mono da oto. Taha para, ma tô oto dasiwi ĩ'âri ni, dazazéb 're, da te ĩnherẽ da. Taha wa, wa oto taha 're nhamra.

⁴ Taha wa, ma'ãpé 'Re ĩhâimana u'âsi mono ma si, ĩ'ãma 're aimreme zusi aba mono za, taha si te te 're ĩpawaptob u'âsi mono da, Cristuhu wasu'uwẽ dama ĩwaihu'u'õ hã ĩpibu pese na si te dama 're wasu'u mono da, da te oto ãma 're ĩwaihu'u pese za'ra mono zéb da hã, ãhã da si te te ĩpisutu wa, 'Re ĩhâimana u'âsi mono hã.

⁵ Asimirosa'rata wẽ, oto ãma 're ĩwaihu'u za'ra wa'aba mono zéb zarina, te za Cristuhu zazei'õ'wa norĩ ma aihâimana prédup sina tãma 're aihâimana za'ra wa'aba mo. Duré 're danhopêtẽ za'ra wa'aba mono sidâpâsi, te za Cristuhu wasu'uwẽ hã dama 're ĩwasu'u za'ra wa'aba mo, dasiré 're aihâimana za'ra wa'aba mono ré hã, da te 're waihu'u za'ra mono ãna 're dahâimana za'ra mono tô da, Cristuhu wasu'uwẽ hã.

⁶ ĩsazei'õ'wa norĩ ma, 're rowasu'u za'ra wa'aba mono wamhã, aimreme wẽ na si te za tãma 're ĩrowasu'u za'ra wa'aba mo, tãma ãma 're rowẽ zani za'ra wa'aba mono da, aimreme wẽ na te te ãma 're aiwapari ze za'ra wa'aba mono da. ãne wamhã, ĩ'uwaibaba si te za tô aimreme na tãma ãma 're ĩwa'rãmi za'ra wa'aba mo, Cristuhu wasu'uwẽ na te te ãma 're asadhanarĩ za'ra wa'aba mono zéb uwaibaba.

Paru hã te te ĩdazawi 'rãsutu zé wasu'u

⁷ Wasisãnawã Titicu hã, wama ĩsawi pe hã te za aima ĩwasu'u za'ra wa'wa, ãme ĩhâimana na hã. Ta

hã wasiré Wanhîb'apito ma romhuri wê 'wa, te tô wama umnhasi na 're hâimana.

⁸ Taha wa, wa za oto atême âma satôrî za'ra wa'wa ã ãnhîmi'ui'ére ré, âme rowê na ãwahâimana za'ra na te te aima wawasu'u wê za'ra wa'aba da, taha zarina aima rowê wairébé aba da, wazabâdâ.

⁹ Taha siré, te za duré Onezimo hã âma mo, wasisânawã wama ãsawi pese hâiba amo hã, wama ã'umnha hã ta hã duré, tame asiré ãsazei'wa norî, asiré 're aihâimana za'ra wa'aba mono hã. Ta norî si te te aima rowasu'u za'ra wa'wa, âme ãromhâimanazém na hã, duré ãwahâimana za'ra zém na zama.

¹⁰ Aritacu hã âme dazazéb 're, ãsiré ãhâiba hã te âma asawi za'ra wa'wa, timreme na. Marcusi hã te duré âma asawi za'ra wa'wa, Banabéhé mama amoi 'ra hã. Taha na wa tô nimahã na hã aima âma roti pari za'ra wa'wa, niwa atême wisi za'ra wa'aba wamhã, asiwi sawi wê wa'aba da.

¹¹ Zuzuwé hã te duré âma asawi za'ra wa'wa, Zusitu na ãsisi amo hã. Å norî hã zudezu na 're ãhâimana za'ra mono, si'ubdatô ãhâiba za'ra hã. ãsiré romhuri'wa norî hã ahâ uptabi nherê, si'ubdatô si te zudezu norî hã te te ãsiré 're romhuri za'ra, tô ã norî hã, 'Re ãhâimana u'âsi mono, da'âma 're ãsib'a'uwê mono zéb u, wa te tâma 're ãda'awaibui mono na hã. Å norî hã ma tô siwi ãpawapto pese za'ra tô.

¹² Epaprasi te duré âma asawi za'ra wa'wa, tame asiré ãsazei'wa norî siré 're ãhâimana mono hã, Cristu Zezusihi ma romhuri'wa hã. Ta hã te ai'âma 're mreme u'âsi 'wa simi'ê na, 'Re ãhâimana u'âsi mono ma, taha si te te 're aipawapto u'âsi za'ra wa'aba mono da, asiptete sina âma 're anomro aba mono da, duré aihâimana prédup sina 're aihâimana

wě za'ra wa'aba mono da, ta hã te te aima 're ĩwě za'ra wa'aba mono zéb zarina si. Cristu hã asina 're ĩ'umnhasi za'ra wa'aba mono zém na 're asiptete za'ra wa'aba mono da, te duré ai'ãma 're mreme u'âsi 'wa.

13 Ta hã te te ai'ãma 're ĩromhuri pese za'ra wa'aba mono na, wa tô ta hã ĩsi'uihã na waihu'u. Radiseza na 'ri nho'õmo nhisi ãma ĩsazei'wa norĩ 're ĩhãimana za'ra mono norĩ ãma, te te 're ĩromhuri pese mono na wa tô duré waihu'u. Duré Irapuri na 'ri nho'õmo nhisi ãma ĩsazei'wa norĩ 're ĩsi'ubumroi mono norĩ ãma, te te 're ĩromhuri pese mono na zama, wa tô waihu'u, ta hã.

14 Rucasi hã, dawede'wa wama ĩsawi pe hã te duré ãma asawi za'ra wa'wa. Demasihi zama te duré ãma asawi za'ra wa'wa.

15 Ma'ãpé, duré wasisãnawã norĩ hã wama sawi za'ra wa'aba, Radiseza na 'ri nho'õmo nhisi ãma 're ĩsi'ubumroi mono norĩ hã. Duré Nipaha zama wama sawi za'ra wa'aba. Duré taha nhorõwa ãma Cristuhu zazei'wa, siré 're ĩsi'rã'õtõ u'âsi mono norĩ zama, wama sawi za'ra wa'aba.

16 ã hã te ãma aima ĩrob'ui'ééré za'ra wa'wa hã asisõ'a asima söré pari za'ra wa'aba wamhã, te za asiwi ĩsõmri 'wa, Radiseza u, tame ĩsazei'wa norĩ hã sisõ'a te te duré sima söré za'ra da. Duré Radiseza u te dama ĩrob'ui'ééré hã te za duré ĩwa'rãmi aima sõmri za'ra wa'wa, ta hã duré asima söré za'ra wa'aba da.

17 Atipuhu ma, ma'ãpé ãne hã 'maiwaihu'u aba za: “Re ĩhãimana u'âsi mono, romhuri te te aima ĩpisudu hã 'mairēme õ di za. Uburé te za tãma ãma ĩ'a'uwaimrami mo.” ãne hã te za tãma ĩ'maiwaihu'u 'wa, Atipuhu ma hã.

18 Wa hã Paru, wa ĩnhimi'ui'ééré na ãma asawi

za'ra wa'wa. Ma'ãpé ì'ãma 're aipo're pu'u u'âsi
za'ra wa'aba mono za, dazazéb 're zahadu
ìhâimana na hã.

Rowě u'âsi 're aihâimana za'ra wa'aba mono za,
Wamama hã ai'ãma 're ìsiwãrĩ za'ra wa'aba mono
zéb zarina.

'Re ãhãimana u'ãsi mono zadawa wasu'u
New Testament in Xavãnte (BR:xav:Xavãnte)

copyright © 2004 Wycliffe Bible Translators, Inc.

Language: Xavãnte

Translation by: Wycliffe Bible Translators, Inc.

Xavãnte [xav], Brazil

Copyright Information

© 2004, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 1882536746

The New Testament

in Xavãnte

© 2004, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

744f0b3a-210f-53c7-b3a1-39b62617ba0c